



ZDRAVSTVENA EDUKACIJA "REPRODUKTIVNO I SEKSUALNO ZDRAVLJE MLADIH"

U okviru Godišnjeg plana zdravstvenih projekata za 2024. godinu, Adriatic Metals BH organizirao je zdravstvenu edukaciju pod nazivom "Reproduktivno i seksualno zdravlje mladih".

Edukacija je održana u srednjoj školi Nordbat-2 Vareš, 5. decembra 2024. godine, gdje su se okupili učenici trećih i četvrtih razreda kako bi prisustvovali predavanju o ovoj izuzetno važnoj i osjetljivoj temi. Primarni cilj edukacije bio je prenijeti ključna znanja o reproduktivnom i seksualnom zdravlju mladim osobama. Reproduktivno i seksualno zdravlje su često tabu tema u zajednicama, a ključne su za fizički i emocionalni razvoj adolescenata. Odabir učenika trećih i četvrtih razreda kao ciljne grupe bio je namjeren, s obzirom na to da je ova razvojna faza obilježena istraživanjem takvih tema, preuzimanjem novih odgovornosti i donošenjem značajnih životnih odluka. Predavanje je učenicima pružilo uvid u prevenciju neželjenih posljedica, poput spolno prenosivih infekcija i neželjene trudnoće, te naglasilo važnost donošenja informiranih i odgovornih odluka vezanih za njihovo zdravlje. Edukaciju je vodila dr. Aida Plečić-Brkić, specijalistica ginekologije i akušerstva, koja je također članica lokalne zajednice. Dr. Plečić-Brkić, koja trenutno radi u Domu zdravlja Vareš, iskoristila je svoje bogato iskustvo i stručnost kako bi predstavila temu na način koji je bio razumljiv i prilagođen potrebama učenika. Angažman dr. Plečić-Brkić dodatno je unaprijedilo ovu inicijativu, jer je svojim profesionalnim autoritetom i empatičnim pristupom uspjela uspostaviti izvrsnu komunikaciju s mladim učesnicima.

U prostorijama JU Centar za kulturu i obrazovanje Vareš, 20. decembra, 2024., kompanija Adriatic Metals BH, u suradnji s Općinom Vareš, organizirala je svečanost povodom obilježavanja Dana rudara.

Ovaj poseban događaj okupio je mnoge goste iz javnog života, stanovnike općine, kao i rukovodstvo kompanije i Općine. Svečanost je započela u 19 sati, a dvorana je bila ispunjena do posljednjeg mjesta, što pokazuje koliko je ovaj dan važan za zajednicu. Među prisutnima su bili članovi Općinskog vijeća, načelnik Općine Vareš, Zdravko Marošević, i izvršna direktorica za korporativne poslove Adriatic Metals BH, Sanela Karić, koji su svojim govorima dodatno istaknuli važnost ovog dana. U svom govoru, načelnik Zdravko Marošević naglasio je da je Dan rudara poseban za sve stanovnike Vareša, općine s bogatom rudarskom tradicijom. Istaknuo je da uz podršku Adriatic Metals BH, općina raste i razvija se, te činjenica da su mnogi mladi iz lokalne zajednice zaposleni u kompaniji, donosi dodatnu sigurnost i zadovoljstvo porodicama. Izvršna direktorica za korporativne poslove Adriatic Metals BH, Sanela Karić, zahvalila je općini i svim stanovnicima na podršci radu kompanije. Također je istaknula da osjeća ponos zbog činjenice da Adriatic Metals BH aktivno doprinosi lokalnoj zajednici te poželjela puno uspjeha u budućim projektima. Svečanost su obogatili učenici Osnovne škole Vareš i udruženje "Moja prva nota" iz Vareša, koji su izveli nekoliko recitacija i muzičkih numera. Njihovi nastupi dodali su svečanu i emotivnu notu događaju, a publika ih je nagradila toplim pljeskom. Prikazan je i kratki dokumentarni film, Drugi udar, Vlade Balvanovića, koji je snimljen 1954. godine i koji prikazuje izgradnju pristupnih puteva, uspinjača i utovarnih stanica za potrebe Rudnika i željezare Vareš. Prisustvo velikog broja ljudi pokazuje zajedničku želju za očuvanjem rudarske tradicije i slavljenjem uspjeha lokalne zajednice.



Proslava Dana rudara još jednom je pokazala povezanost Adriatic Metals BH s lokalnim stanovništvom i njihovu zajedničku viziju prosperiteta.

NASTAVAK SARADNJE ADRIATIC METALS BH I NOGOMETNOG KLUBA VAREŠ

Nakon sastanka direktorice za korporativne poslove Adriatic Metals BH s upravom Nogometnog kluba Vareš, sa zadovoljstvom najavljujemo da će Adriatic Metals BH nastaviti podržavati Nogometni klub Vareš




Tokom sastanka, uprava kluba podijelila je svoje impresivne rezultate iz prethodne sezone, koji uključuju i fenomenalni prelazak u višu ligu. Također su predstavili i svoje planove za budućnost, viziju rasta i uspjeha koja se blisko podudara s vrijednostima naše kompanije. Direktorica Karić je uputila srdačne čestitke klubu na izvanrednom uspjehu i istaknula ponos kompanije jer je dio ove lijepe priče.

Također, naglasila je i da naša kontinuirana podrška nije samo posvećenost klubu, nego i lokalnoj zajednici i duhu timskog rada koji klub utjelovljuje.

STATISTIKE ODJELA ZA LJUDSKE RESURSE

S velikim zadovoljstvom nastavljamo s našom redovnom rubrikom Statistike Odjela za ljudske resurse. Naš cilj je osigurati transparentnost i informiranost, kako naši zaposlenih, tako i zajednice u kojoj djelujemo. Na kraju 2024. godine, zaključno s 31. decembrom Adriatic Metals BH zapošljava 522 predanih pojedinaca, od kojih je 229 iz Vareša. Našu radnu snagu čini 391 muškarac i 131 žena. Posebno smo ponosni da od ukupnog broja zaposlenih, 25% čine žene. Ovi podaci ne samo da potvrđuju našu opredijeljenost za podršku i razvoj lokalne zajednice, nego i našu predanost ravnopravnosti i inkluzivnosti radnog okruženja.



PROGRAM STIPENDIRANJA "ADRIATIC PODRŽAVA NAJBOLJE"

"Adriatic Metals BH podržava najbolje" bio je naziv inicijative kroz koju je kompanija dodijelila stipendije studentima Rudarsko-geološkog fakulteta u Tuzli i Rudarskog fakulteta u Prijedoru. Izvršna direktorica za korporativne poslove kompanije, Sanela Karić, ugostila je nagrađene studente u prostorijama Informativnog centra, gdje je organizirano svečano potpisivanje ugovora o stipendiranju. Među dobitnicima stipendija bilo je šest studenata Rudarsko-geološkog fakulteta u Tuzli i četiri studenta Rudarskog fakulteta u Prijedoru. Program je podržavao studente upisane na akademske discipline usko povezane s rudarskom industrijom. Pri odabiru stipendista, akademski uspjeh bio je primarni kriterij, ali su se uzimali u obzir i drugi aspekti akademskog i društvenog angažmana, poput volonterskog rada, sportskih postignuća, natjecanja i drugih aktivnosti koje pokazuju odgovornost, pouzdanost i aktivno sudjelovanje u lokalnoj zajednici. Događaj je bio više od formalnog okupljanja; bio je to trenutak ispunjen smijehom, razgovorima o snovima i aspiracijama te grupnim fotografijama koje će ostati drage uspomene na ovaj poseban dan. Studenti su izrazili zahvalnost direktorici Karić i kompaniji Adriatic Metals BH na njihovoj podršci. Kroz ovaj događaj, Adriatic Metals BH potvrđuje svoju predanost društvenoj odgovornosti, pokazujući da briga za budućnost nije samo obećanje, već konkretno djelovanje.



LIVING HISTORY PROJECT

Ibrahim Sirotanović

Prije svega, želim da Vas pozdravim i zahvalim što ste pristali govoriti za naš bilten, a koji je u sklopu projekta „Living History Project“. Za početak recite nam nešto više o sebi.

Zovem se Ibrahim Sirotanović, rođen 1955. godine u selu Orahovo, pored Breze. Nažalost, ja sam s 14 godina izgubio oca u rudarskoj nesreći i na neki način taj događaj je odredio moj put. Nakon završetka osnovne škole, kao dijete stradalog rudara, imao sam priliku upisati bilo koju srednju školu, budući da je formiran Fond 14. mart, koji je osiguravao podršku porodicama poginulih rudara, ja sam ipak odabrao Rudarsku školu u Tuzli i nastavio porodičnu tradiciju. Nakon završetka srednje škole, kratko sam radio u Rudniku mrkog uglja Breza, da bih nakon nekoliko mjeseci dobio posao pogonskog rudarskog tehničara u Rudniku i željezari Vareš. Radio sam i kao nadzornik vjetrenja, smjenski poslovođa, a potom i kao glavni poslovođa proizvodnje u jami Droškovac.

Kako je izgledao tipičan radni dan u rudniku dok ste vi radili?

Moje odgovornosti bile su usmjerene na praćenje rada smjenskih poslovođa, analizu njihovih izvještaja, izrada planova proizvodnje i otklanjanje svih zastoja i problema u proizvodnji.

Koje vještine su bile potrebne za uspješno obavljanje Vašeg posla?


Osnovno je poznavanje rudarskih procesa i procedura u jami, a zatim socijalne vještine, sposobnost da se uspješno komunicira, koordinira i motivira zaposlene.

Postoji li nešto što smatrate da se posebno promijenilo u odnosu na vrijeme kad ste vi radili?

Naravno, razina buke u proizvodnom pogonu je neusporediva s razinom buke u kojoj sam ja radio. Tehnologija je toliko napredovala da su sad procesi znatno tiši, što pozitivno utiče na dobrobit radnika u proizvodnog pogonu.

Kako su se tehnologije koje ste koristili u poslu mijenjale tokom Vašeg radnog vijeka?

U jami Droškovac primjenjivala se tzv. švedska metoda otkopavanja, jama je bila projektovana na način da nismo imali puno mogućnosti za uvođenje novih tehnologija. Mada, kad sam tek počeo raditi koristili smo utovarivače za otkopavanje na zračni pogon, koji su kasnije zamijenjeni utovarivačima na dizel, koji su znatno olakšali proces rada, bili su sigurniji za rukovanje i mogli smo brže napredovati. Jedino što smo, u svakoj smjeni, morali mjeriti koncentraciju CO (ugljen monoksida) u ispušnim plinovima.



Nedavno ste bili dio grupe penzionera/umirovljenika Vareša, bivših radnika Energoinvesta i Rudnika i željezare Vareš, koji su posjetili novoizgrađeni Pogon za preradu rude kompanije Adriatic Metals BH, kakvi su Vaši dojmovi?!

Kao predsjednik Udruženja penzionera Vareš, zajedno s kolegom Seadom Abdijevskim, pokrenuo sam inicijativu i uputio zahtjev Vašoj kompaniji da se bivšim rudarima omogući posjeta Vašem proizvodnom pogonu. Zaista sam jako sretan što sam imao priliku, sa svojim bivšim kolegama, posjetiti VPP. Dobrodošlicu su nam poželjeli menadžeri kompanije i prezentirali svoj rad. Impresioniran sam stručnošću tih mladih ljudi, kao i novim metodologijama u radu, posebno kad je riječ o zaštiti ljudi, zaposlenih, a i zaštiti okoliša.

Iako ste u penziji i dalje ste aktivan član zajednice kao predsjednik Udruženja penzionera/umirovljenika Vareš. Koje aktivnosti i projekte provodi Udruženje?

Već desetak godina sam aktivan član Udruženja, a sada i predsjednik. Naša primarna aktivnost se odnosi na osiguravanje pomoći i podrške našim članovima. U skladu s našim mogućnostima osiguravamo i novčanu pomoć, za one članove kojima je to potrebno.

Na koji način se vaši članovi angažuju u zajednici?

Aktivni su u rješavanju problema naših članova, imamo svoje predstavnike na kantonalnom i federalnom nivou, zajednički organiziramo posjete kulturno-historijskim spomenicima, izlete i odlaske na more.

Šta biste voljeli postići kao predsjednik Udruženja?

Rekao bih da je taj cilj djelomično i ispunjen. Prije dvije godine, uz podršku Općinskog vijeća sam uspio uvrstiti naše Udruženje, kao posebnu stavku, u budžet Općine. Nadam se da će se taj iznos koji primamo u budućnosti i povećati.

Šta biste voljeli poručiti mladima koji tek počinju svoj karijerni put?

Prilikom posjete Vašem proizvodnom pogonu upoznao sam mnogo mladih ljudi koji rade za Vas, što znači da mladi Vareša sad imaju više mogućnosti i ne moraju odlaziti iz zemlje. Mladima bih poručio da ulažu u svoje obrazovanje i svoju budućnost grade ovdje.

Hvala Vam na izdvojenom vremenu.

Hvala Vama na pozivu i na gostoprimstvu, i ovdje i na Tisovcima. Nastavite putem kojim ste krenuli i želim Vam uspješan rad još mnogo godina.